

Workshop di UNESCO na Aruba

Herencia Inmaterial ta topa cu herencia material durante recepcion na Fort Zoutman

ORANJESTAD -- Fort Zoutman/Willem III Toren ta un edificio iconico, un asina yama "landmark" di sumo importancia entre e coleccion di obheto y edificionan cu nos isla ta conta cune como nos herencia material. E monumentonan tabata pues e luga ideal tambe pa organisa un anochi ameno pa e participantenan na e workshop di

UNESCO tocante proteccion di Herencia Cultural Inmaterial, incluyendo delegacionnan di tur seis isla di Caribe Hulandes y Hulanda. Participantenan nan e workshop di tres dia, hunto cu Minister di Asuntonan Economico, Asuntonan Social y Cultura, Michelle Hooyboer-Winklaar a disfruta di un demostracion di algun elemento

di nos herencia inmaterial y un cena bao di streya na Fort Zoutman dialuna anochi. E ambiente tabata bunita y relajante, unda cu participantenan a probecha intercambia di idea y combersa tocante nan trabao y custumbernan di nan paisnan.

Minister Hooyboer-Winklaar a percura pa pusha nos musica di Dande, cual ta un di e elementonan mas importante di Aruba su herencia inmaterial. E mandatario a percura pa documentacion di nos Dande y a presenta esaki na Nacionnan Uni pidiendo pa su reconocimiento internacional como herencia inmaterial. Entretanto e proceso aki ta biniendo cla poco poco.

Minister a expresa cu e ta satisfecho cu tin atencion special y entusiasmo pa herencia



inmaterial den henter Reino Hulandes y cu hunto e partnernan kier traha pa preservacion di esaki, cual lo bay perdi si e no wordo documenta y

promovi manera mester ta. E asistencia y guia di UNESCO lo duna bon resultado si pone esfuersonan y energia positivo su tras. □